

“Službene novine Kantona Sarajevo”, broj 27/07

Na osnovu člana 18. tačka b) Ustava Kantona Sarajevo ("Službene novine Kantona Sarajevo", broj 1/96, 2/96 - Ispravka, 3/96 - Ispravka, 16/97, 14/00, 4/01 i 28/04), člana 1. stav 2. i članova 196. i 219. Zakona o izvršenju krivičnih sankcija u Federaciji Bosne i Hercegovine ("Službene novine Federacije BiH", broj 44/98), Skupština Kantona Sarajevo, na sjednici od 30. augusta 2007. godine, donijela je

ZAKON O IZVRŠENJU SANKCIJA U KANTONU SARAJEVO

DIO PRVI - OSNOVNE ODREDBE

Član 1. (Sadržaj)

Ovim Zakonom uređuje se izvršenje novčane kazne izrečene pravnom licu za krivično djelo, izvršenje mjera sigurnosti i odgojnih mjera izrečenih učiniocu krivičnog djela, odgoda i prekid izvršenja odgojnih mjera, izvršenje prekršajnih sankcija, osim novčane kazne izrečene fizičkom licu, kao i druga pitanja od značaja za izvršenje sankcija u Kantonu Sarajevu (u daljnjem tekstu: Kanton).

Član 2. (Način izvršenja sankcija i mjera)

Sankcije i mjere iz člana 1. ovog Zakona, izrečene učiniocu krivičnog djela (u daljnjem tekstu: osuđeno lice) i prekršaja (u daljnjem tekstu: kažnjeno lice) izvršavaju se na način uređen ovim Zakonom.

Član 3. (Organi izvršenja sankcija i mjera)

(1) Na teritoriji Kantona, sankcije i mjere iz člana 1. ovog Zakona, za osuđena lica i kažnjena lica, koja imaju prebivalište, boravište, odnosno sjedište na teritoriji Kantona (u daljnjem tekstu: prebivalište), izvršavaju slijedeći organi:

- a) sud koji je donio prvostepenu odluku kojom je sankcija izrečena (u daljnjem tekstu: prvostepeni sud),
- b) Općinski sud u Sarajevu, na čijem području osuđeno, odnosno kažnjeno lice ima prebivalište (u daljnjem tekstu: Općinski sud),
- c) Javna ustanova "Kantonalni centar za socijalni rad" -Služba socijalne zaštite općine u kojoj osuđeno maloljetno lice ima prebivalište (u daljnjem tekstu: Centar za socijalni rad),
- d) Kantonalna javna ustanova "Disciplinski centar za maloljetnike" (u daljnjem tekstu: Disciplinski centar za maloljetnike),
- e) Ministarstvo unutrašnjih poslova Kantona - policijska uprava općine na teritoriji Kantona u kojoj osuđeno, odnosno kažnjeno lice ima prebivalište (u daljnjem tekstu: policijska uprava),
- f) nadležni inspeksijski organ čije je sjedište na teritoriji Kantona (u daljnjem tekstu: inspeksijski organ).

(2) Organi iz stava (1) ovog člana izvršavaju i sankcije i mjere koje su osuđenim, odnosno kažnjenim licima, koja imaju prebivalište na teritoriji Kantona, izrekli sudovi i drugi ovlašteni organi čije sjedište nije na teritoriji Kantona.

(3) Sankcije i mjere koje su osuđenim, odnosno kažnjenim licima, koja nemaju prebivalište, odnosno sjedište na teritoriji Kantona, izrekli sudovi ili drugi organi čije je sjedište na teritoriji Kantona, izvršavaju ovlašteni organi određeni zakonom kantona u kojem osuđeno, odnosno kažnjeno lice ima prebivalište.

Član 4.

(Lišavanje ili ograničavanje prava)

Lica prema kojima se izvršavaju sankcije i mjere lišavaju se prava ili se ograničavaju u pravima samo u granicama nužnim za ostvarivanje svrhe pojedinih sankcija i mjera, u skladu sa zakonom.

Član 5.

(Odluka koja se izvršava)

(1) Izvršenju sankcije i mjere pristupa se kad odluka kojom je sankcija, odnosno mjera izrečena postane pravosnažna i ako za izvršenje sankcije, odnosno mjere nema zakonskih smetnji (u daljnjem tekstu: izvršna odluka).

(2) Sa izvršenjem sankcije i mjere može se otpočeti i prije nego što je odluka kojom je sankcija, odnosno mjera, izrečena postala pravosnažna, samo ako je to zakonom posebno predviđeno.

Član 6.

(Provođenje izvršenja bez odgađanja)

(1) Kad su ispunjeni uvjeti da se pristupi izvršenju sankcije, odnosno mjere, organ koji je izrekao sankciju, odnosno mjeru, obavezan je preduzeti potrebne radnje da se izvršenje sankcije, odnosno mjere, provede bez odgađanja, u skladu sa ovim Zakonom.

(2) Izvršenje sankcije, odnosno mjere, može biti odgođeno samo u slučajevima i pod uvjetima predviđenim zakonom.

Član 7.

(Dostavljanje odluke organu izvršenja)

Organ koji je donio prvostepenu odluku kojom je sankcija, odnosno mjera, izrečena dužan je da, ako nije nadležan da je sam izvrši, izvršnu odluku dostavi organu nadležnom za izvršenje, najkasnije u roku tri dana od dana kada je odluka postala izvršna, odnosno od dana kada je tu odluku primio od višeg organa.

Član 8.

(Obavezna saradnja sa ustanovama za izvršenje sankcija i mjera i pristup međunarodnih organizacija i drugih institucija osuđenim, odnosno kažnjenim licima)

(1) Organi vlasti, ustanove i druga pravna lica, u čijem djelokrugu je primjena zdravstvenih, socijalnih, odgojnih ili drugih mjera od značaja za izvršenje pojedinih sankcija i mjera, obavezni su saradivati sa ustanovama u kojima se izvršavaju sankcije, odnosno mjere (u daljnjem tekstu: ustanove).

(2) U cilju što potpunijeg ostvarivanja svrhe pojedinih sankcija i mjera, ustanove saraduju s pravnim licima koja bi im, prema svojoj djelatnosti, mogla pružiti pomoć.

(3) Ustanove su dužne omogućiti domaćim i međunarodnim organizacijama i drugim institucijama nadležnim za praćenje i ostvarivanje ljudskih prava i osnovnih sloboda,

pristup i razgovor sa osuđenim, odnosno kažnjenim licima, u skladu sa zakonom i odgovarajućim međunarodnim dokumentima.

Član 9.

(Troškovi izvršenja)

Lice prema kojem je primijenjena sankcija, odnosno mjera, ne plaća troškove izvršenja, osim troškova novčane kazne, kao i drugih troškova u skladu sa zakonom.

Član 10.

(Neplaćanje taksi)

Za podneske, službene radnje, rješenja i druge akte u vezi sa izvršenjem sankcija, odnosno mjera, ne plaća se taksa.

Član 11.

(Ovlaštenja Ministarstva pravde i uprave)

(1) Ministarstvo pravde i uprave Kantona (u daljnjem tekstu: Ministarstvo pravde) prati i proučava izvršenje sankcija i mjera, analizira izvještaje o izvršenju pojedinih sankcija i mjera i predlaže mjere za unapređenje njihovog izvršenja.

(2) Kantonalni ministar pravde može osnovati stručni savjet iz reda predstavnika naučnih ustanova, sudova, organa uprave, stručnih udruženja i drugih institucija koja se bave pitanjima odgoja, kriminaliteta i prekršaja, radi praćenja, proučavanja i unapređenja sistema izvršenja sankcija, odnosno mjera.

Član 12.

(Poseban interes za Kanton)

Poslovi izvršenja sankcija i mjera, propisani ovim Zakonom, su poslovi od posebnog interesa za Kanton.

DIO DRUGI - IZVRŠENJE NOVČANE KAZNE I MJERA SIGURNOSTI IZREČENIH ZA UČINJENO KRIVIČNO DJELO

POGLAVLJE I - IZVRŠENJE NOVČANE KAZNE IZREČENE OSUĐENOM PRAVNOM LICU

Član 13.

(Organ izvršenja)

Novčanu kaznu izrečenu osuđenom pravnom licu izvršava prvostepeni sud koji je izrekao novčanu kaznu.

Član 14.

(Način izvršenja)

Novčana kazna izrečena osuđenom pravnom licu izvršava se direktnom prinudnom naplatom - blokiranjem računa pravnog lica, u skladu sa propisima kojima se reguliše izvršni postupak.

POGLAVLJE II - IZVRŠENJE MJERA SIGURNOSTI

Odjeljak A.

Zabrana vršenja poziva, aktivnosti ili funkcije

Član 15.

(Organ izvršenja i način izvršenja)

(1) Radi izvršenja mjere zabrane vršenja određenog poziva, aktivnosti ili funkcije, prvostepeni sud dostavlja izvršnu odluku organu uprave nadležnom za izdavanje dozvole, odnosno odobrenja za vršenje određenog poziva, aktivnosti ili funkcije, radi evidentiranja izrečene mjere, kao i nadležnom inspeksijskom organu.

(2) Izvršnu odluku, kojom je izrečena mjera sigurnosti iz stava (1) ovog člana, prvostepeni sud dostavlja i pravnom ili drugom licu kod kojeg osuđeno lice obavlja poziv, aktivnost ili djelatnost.

Član 16.

(Nadzor nad izvršenjem i prekršaji)

(1) Inspeksijski organ iz člana 15. stav (1) ovog Zakona, kao i pravno i drugo lice iz stava (2) člana 15. ovog Zakona, stara se da osuđeno lice, u roku koji je određen odlukom, ne vrši zabranjeni poziv, aktivnost ili funkciju.

(2) Ako posebnim propisom nije drukčije određeno, osuđeno lice koje vrši poziv, aktivnost ili funkciju koja mu je zabranjena, kaznit će se za prekršaj novčanom kaznom od 200 do 1.000 KM.

(3) Pravno lice koje osuđenom licu povjeri vršenje poziva, aktivnosti ili funkcije koja mu je zabranjena, kaznit će se za prekršaj novčanom kaznom od 3.000 do 10.000 KM, a odgovorno lice u tom pravnom licu, novčanom kaznom od 200 do 1.000 KM.

Odjeljak B.

Zabrana upravljanja motornim vozilom

Član 17.

(Organ izvršenja i način izvršenja)

Mjeru sigurnosti zabrane upravljanja motornim vozilom izvršava policijska uprava na način i po postupku propisanom zakonom i provedbenim propisom kojim se reguliše postupak i način izvršenja mjere sigurnosti i zaštitne mjere zabrane upravljanja motornim vozilom.

Odjeljak C.

Lišenje predmeta

Član 18.

(Organ izvršenja i način izvršenja)

(1) Mjeru sigurnosti lišenja predmeta, izrečenu osuđenom licu i osuđenom pravnom licu, izvršava prvostepeni sud, po propisima kojima je reguliše izvršni postupak, a prema prirodi predmeta odredit će da li će se ti predmeti prodati po propisima izvršnog postupka ili će se uništiti ili ustupiti određenom državnom organu ili organizaciji.

(2) Troškove, koji nastanu prinudnim izvršenjem mjere sigurnosti iz stava (1) ovog člana, snosi lice kome je ta mjera izrečena.

(3) Sredstva ostvarena prodajom predmeta iz stava (1) ovog člana pripadaju odgovarajućem budžetu, u skladu sa zakonom koji uređuje pripadnost javnih prihoda.

Odjeljak D.
Zabrana vršenja određene privredne aktivnosti

Član 19

(Organ izvršenja i način izvršenja)

Radi izvršenja mjere sigurnosti zabrane obavljanja određene privredne aktivnosti, koja je izrečena osuđenom pravnom licu, prvostepeni sud dostavlja izvršnu odluku sudu u kojem je osuđeno pravno lice registrovano, radi upisa zabrane u registar, kao i nadležnom inspeksijskom organu.

Član 20.

(Nazor nad izvršenjem i prekršaji)

- (1) Inspeksijski organ iz člana 19. ovog Zakona stara se da osuđeno pravno lice ne vrši zabranjenu privrednu aktivnost.
- (2) Ako posebnim propisom nije drukčije određeno, osuđeno pravno lice koje obavlja privrednu aktivnost koja mu je zabranjena kazniti će se novčanom kaznom od od 3.000 do 10.000 KM, a odgovorno lice u tom pravnom licu novčanom kaznom od 200 do 1.000 KM.

DIO TREĆI - IZVRŠENJE ODGOJNIH MJERA IZREČENIH OSUĐENOM MALOLJETNOM LICU

Član 21.

(Primjena zakona u izvršenju odgojnih mjera)

Odgojne mjere (disciplinske mjere i mjere pojačanog nadzora), izrečene osuđenom maloljetnom licu, izvršavaju se na način i po postupku utvrđenom odredbama Krivičnog zakona Federacije Bosne i Hercegovine i Zakona o izvršenju krivičnih sankcija u Federaciji Bosne i Hercegovine (u daljem tekstu: Federalni zakon), koje se odnose na izvršenje odgojnih mjera, i ovim Zakonom.

POGLAVLJE I - IZVRŠENJE DISCIPLINSKE MJERE UPUĆIVANJA U DISCIPLINSKI CENTAR ZA MALOLJETNIKE

Član 22.

(Disciplinski centar za maloljetnike)

Disciplinska mjera upućivanje u disciplinski centar za maloljetnike, na određeni broj sati u praznične dane ili na određeni broj sati u toku dana ili na neprekidni boravak na utvrđeni broj dana (u daljnjem tekstu: disciplinska mjera), izvršava se u Disciplinskom centru za maloljetnike.

Član 23.

(Dostavljanje izvršne odluke Centru za socijalni rad i Disciplinskom centru za maloljetnike)

Izvršnu odluku, kojom je maloljetniku izrečena disciplinska mjera, Općinski sud dostavlja Centru za socijalni rad i Disciplinskom centru za maloljetnike.

Član 24.

(Početak izvršenja)

- (1) Centar za socijalni rad, u dogovoru sa Disciplinskim centrom za maloljetnike, poziva maloljetnika da se određenog dana i sata, u pratnji roditelja, usvojitelja ili staratelja, javi u Disciplinski centar za maloljetnike, radi izvršenja disciplinske mjere.
- (2) Izvršenje disciplinske mjere iz člana 22. ovog Zakona počinje od dana kad se maloljetnik javi u Disciplinski centar za maloljetnike.

Član 25.

(Obaveze roditelja, usvojitelja i staratelja, Disciplinskog centra za maloljetnike i Centra za socijalni rad)

- (1) Roditelj, usvojitelj ili staratelj maloljetnika dužan je da obezbijedi redovni dolazak maloljetnika u Disciplinski centar za maloljetnike, najkasnije u roku od 48 sati, a u slučaju da maloljetnik, iz opravdanih razloga, bude spriječen da dođe određenog dana u Disciplinski centar za maloljetnike, dužan je da o tome odmah obavijesti Disciplinski centar za maloljetnike.
- (2) Ako se maloljetnik određenog dana i u određeno vrijeme ne javi Disciplinskom centru za maloljetnike ili prestane da redovno dolazi, Disciplinski centar za maloljetnike o tome obavještava Centar za socijalni rad i Općinski sud, radi preduzimanja odgovarajućih mjera.

Član 26.

(Vrijeme izvršavanja)

- (1) Disciplinska mjera upućivanja u disciplinski centar za maloljetnike na određeni broj sati u praznične dane ili na određeni broj sati u toku dana, izvršava se između 8 i 20 sati, u slobodnom vremenu maloljetnika usklađenom sa školskim i radnim obavezama.
- (2) Maloljetniku, upućenom u Disciplinski centar za maloljetnike na neprekidni boravak na utvrđeni broj dana, obezbjeđuje se smještaj i ishrana.
- (3) Maloljetniku, upućenom u Disciplinski centar za maloljetnike na period duži od šest sati dnevno, obezbjeđuje se odgovarajući broj obroka hrane.

Član 27.

(Plan i program za rad s maloljetnikom)

- (1) Disciplinski centar za maloljetnike donosi plan i program za rad s maloljetnikom.
- (2) Disciplinski centar za maloljetnike organizuje obavljanje korisnih radova prilagođenih uzrastu maloljetnika, sklonostima i sposobnostima, a u skladu sa utvrđenim školskim ili radnim obavezama maloljetnika.

Član 28.

(Pridržavanje pravila kućnog reda i uputstava i savjeta)

- (1) Maloljetnik je dužan da se, u Disciplinskom centru za maloljetnike, pridržava pravila kućnog reda i uputstava i savjeta ovlaštenih stručnih radnika.
- (2) Ako se, zbog nediscipline maloljetnika ili lica iz člana 25. ovog Zakona, disciplinska mjera ne može izvršiti, Disciplinski centar za maloljetnike, najkasnije u roku od 48 sati, o tome obavještava Centar za socijalni rad i Općinski sud, radi preduzimanja odgovarajućih mjera.

POGLAVLJE II - IZVRŠENJE MJERA POJAČANOG NADZORA

Odjeljak A.

Pojačan nadzor od strane roditelja, usvojitelja ili staratelja

Član 29.

(Početak izvršenja)

Izvršenje mjere pojačanog nadzora od strane roditelja, usvojitelja ili staratelja počinje od dana kad se roditeljima, usvojitelju ili staratelju maloljetnika dostavi izvršna odluka Općinskog suda radi izvršenja ove mjere.

Član 30.

(Način izvršenja)

Izvršenje mjere iz člana 29. ovog Zakona obuhvata stalnu i punu brigu roditelja, staratelja ili usvojitelja u odgoju maloljetnika, brigu oko razvijanja radnih navika maloljetnika, odvajanje iz sredine koja na maloljetnika štetno utiče, sređivanje prilika u kojima maloljetnik živi, razvijanje osjećaja lične odgovornosti i podsticanje da i sam učestvuje u svome preodgoju.

Član 31.

(Dužnost postupanja po uputama Općinskog suda)

Ako je Općinski sud dao potrebne upute i naložio određene dužnosti u pogledu mjera koje treba preduzeti za odgoj maloljetnika, njegovo liječenje i za otklanjanje štetnih uticaja na njega, roditelji, usvojitelj ili staratelj dužni su postupati po ovim uputama i izvršavati naložene dužnosti.

Član 32.

(Provjeravanje izvršenja i pomoć roditelju, usvojitelju i staratelju)

- (1) Ako je Općinski sud, pri izricanju mjere iz člana 29. ovog Zakona, odredio da nadležni organ socijalne skrbi provjerava njeno izvršenje i ukazuje pomoć roditelju, usvojitelju ili staratelju, odluka Općinskog suda dostavlja se Centru za socijalni rad.
- (2) U slučaju iz prethodnog stava ovog člana, Centar za socijalni rad dužan je da:
 - a) poziva maloljetnika i njegove roditelje, usvojitelja ili staratelja, radi vođenja razgovora o pitanjima vezanim za izvršenje izrečene mjere,
 - b) provjerava, u saradnji sa školom, preduzećem ili drugim pravnim licem, odnosno organizacijom u kojoj maloljetnik radi ili je uključen, odnos maloljetnika prema radnim obavezama, kao i njegovo ponašanje prema drugim licima,
 - c) pruža pomoć maloljetniku, putem saradnje sa odgovarajućim ustanovama, kad roditelji, usvojitelj ili staratelj nisu u stanju sami da postupe po datim uputama i nalogima.

Član 33.

(Obavještenje o promjeni prebivališta, odnosno boravišta)

Ako maloljetnik, za vrijeme izvršavanja mjere pojačanog nadzora od strane roditelja, usvojitelja ili staratelja, promijeni prebivalište, odnosno boravište, roditelji, usvojitelj ili staratelj dužni su da o tome odmah obavijeste Općinski sud.

Odjeljak B
Pojačan nadzor u drugoj obitelji

Član 34.

(Izvršenje i provjera izvršenja)

- (1) Izvršna odluka Općinskog suda, kojom je izrečena mjera pojačanog nadzora u drugoj obitelji, izvršava se u obitelji koja je primila maloljetnika i vrši nad njim pojačani nadzor.
- (2) Centar za socijalni rad vrši provjeravanje izvršenja mjere iz stava (1) ovog člana i ukazuje potrebnu pomoć obitelji koja je primila maloljetnika.

Član 35.

(Iznalaženje obitelji radi izvršenja)

Centar za socijalni rad, u saradnji sa nadležnim organima u mjesnim zajednicama na teritoriji Kantona, iznalazi obitelji koje su voljne da prime maloljetnika i koje imaju mogućnosti da vrše nad njim pojačani nadzor.

Član 36.

(Određivanje obitelji radi izvršenja)

Centar za socijalni rad određuje, iz spiska obitelji kod kojih se mogu smjestiti maloljetnici, obitelj u kojoj će maloljetnik biti smješten radi izvršenja mjere pojačanog nadzora u drugoj obitelji i o tome obavještava Općinski sud.

Član 37.

(Smještaj maloljetnika u obitelj u kojoj će se izvršavati mjera i troškovi izvršenja)

- (1) Centar za socijalni rad smješta maloljetnika u obitelj u kojoj će se izvršavati izrečena mjera, u skladu s propisima kojima se reguliše smještaj u drugu obitelj.
- (2) Troškove izvršenja mjere pojačanog nadzora u drugoj obitelji snosi Kanton.

Član 38.

(Određivanje smještaja maloljetnika u drugu obitelj zbog izmijenjenih prilika)

Općinski sud može, na prijedlog Centra za socijalni rad ili kad sam ocijeni, odrediti smještaj maloljetnika u drugu obitelj iz člana 35. ovog Zakona, ako su se prilike u obitelji u kojoj je maloljetnik smješten toliko izmijenile da ne obezbjeđuju pravilno izvršenje izrečene mjere.

Član 39.

(Uticanje na sređivanje prilika u obitelji iz koje je maloljetnik izdvojen)

Za vrijeme izvršenja mjere pojačanog nadzora u drugoj obitelji, a u cilju obezbjeđenja uvjeta za vraćanje maloljetnika u njegovu obitelj, Centar za socijalni rad dužan je da utiče na sređivanje prilika u obitelji iz koje je maloljetnik izdvojen.

Član 40.

(Shodna primjena odredaba ovog Zakona)

Odredbe čl. 29. do 33. ovog Zakona shodno se primjenjuju i na izvršenje mjere pojačanog nadzora u drugoj obitelji.

Odjeljak C.
Pojačan nadzor od strane nadležnog organa socijalne skrbi

Član 41.

(Organ izvršenja)

Odluku Općinskog suda, kojom je izrečena mjera pojačanog nadzora od strane nadležnog organa socijalne skrbi, izvršava Centar za socijalni rad.

Član 42.

(Način izvršenja i saradnja)

(1) Po prijemu izvršne odluke Općinskog suda iz člana 41. ovog Zakona, Centar za socijalni rad dužan je da:

- a) ostvaruje neposredni kontakt s maloljetnikom i njegovom obitelji, putem razgovora, posjeta, obilazaka i na drugi pogodan način,
- b) uspostavi stalnu saradnju sa školom, odnosno pravnim i drugim licem, gdje maloljetnik živi i radi.

(2) Obrazovne, odgojne, zdravstvene i druge ustanove, kao i udruženja, odnosno društva koja okupljaju djecu i omladinu, dužni su da saraduju sa Centrom za socijalni rad i da mu pružaju pomoć u izvršenju mjere iz stava (1) ovog člana.

Član 43.

(Obavještanje o okolnostima i prilikama koje negativno utiču na izvršenje)
Roditelji, usvojitelj ili staratelj maloljetnika dužni su da obavještavaju Centar za socijalni rad o okolnostima i prilikama koje negativno utiču na uspješno izvršenje mjere pojačanog nadzora od strane nadležnog organa socijalne skrbi, kako bi Centar za socijalni rad preduzeo odgovarajuće mjere na koje je ovlašten zakonom.

POGLAVLJE III - ODGODA I PREKID IZVRŠENJA ODGOJNIH MJERA

Odjeljak A.

Odgoda i prekid mjere upućivanja u disciplinski centar i mjere pojačanog nadzora u drugoj obitelji

Član 44.

(Odgoda izvršenja)

(1) Izvršenje odgojnih mjera upućivanja u disciplinski centar i pojačanog nadzora u drugoj obitelji, može se odgoditi na molbu maloljetnika, njegovog roditelja, staratelja ili usvojitelja, bračnog druga ili na prijedlog Centra za socijalni rad, u slučaju:

- a) ako je maloljetnik obolio od teže akutne bolesti;
- b) ako se desio smrtni slučaj ili teška bolest u užoj obitelji maloljetnika;
- c) ako se maloljetnik nalazi neposredno pred završetkom škole ili polaganja ispita za koji se pripremao, pa bi mu izvršenje odgojne mjere u ovom momentu moglo nepovoljno uticati na izvršenje tih obaveza;
- d) ako trudnoj maloljetnici do porođaja ne preostaje više od pet mjeseci, kao i maloljetnici koja ima dijete mlađe od jedne godine života.

(2) Izvršenje odgojne mjere u slučaju iz tačke a) stava (1) ovog člana može se odgoditi dok bolest traje, u slučaju iz tačke b) stava (1) ovog člana - najduže za tri mjeseca, u slučaju iz tačke c) stava (1) ovog člana - najduže za šest mjeseci, a u slučaju iz tačke d) stava (1) ovog člana, trudnoj maloljetnici, kao i maloljetnici koja ima dijete mlađe od jedne godine života - do navršene jedne godine života djeteta.

Član 45.

(Molba za odgodu izvršenja)

- (1) Molba za odgodu izvršenja odgojne mjere podnosi se Općinskom sudu.
- (2) Molba iz stava (1) ovog člana podnosi se u roku od tri dana od dana prijema poziva za izvršenje odgojne mjere.
- (3) Ako je razlog za odgodu izvršenja odgojne mjere iz stava (1) tač. a) i b) člana 44. ovog Zakona nastao nakon isteka roka iz stava (1) ovog člana, molba se može podnijeti do dana kad maloljetnik treba da se javi radi izvršenja odgojne mjere.
- (4) U molbi se moraju navesti razlozi, činjenice i dokazi na kojima se zasniva molba za odgodu izvršenja odgojne mjere.

Član 46.

(Odlučivanje o molbi za odgodu izvršenja)

- (1) O molbi za odgodu izvršenja odgojne mjere odlučuje rješenjem Općinski sud, u roku od tri dana od dana prijema molbe.
- (2) Prije donošenja rješenja iz stava (1) ovog člana, sudija za maloljetnike može povjeriti Centru za socijalni rad da izvrši provjeru činjenica navedenih u molbi.
- (3) Molbu koja nije podnesena u roku iz stava (2) člana 45. ovog Zakona ili koja ne sadrži razloge, dokaze i činjenice za odgodu, sud odbacuje rješenjem.
- (4) Do donošenja rješenja o molbi, odgađa se početak izvršenja odgojne mjere.

Član 47.

(Pravo žalbe protiv rješenja kojim se odbija odgoda izvršenja)

- (1) Protiv rješenja kojim se odbija molba za odgodu izvršenja odgojne mjere, podnosilac ima pravo žalbe u roku od tri dana od dana prijema rješenja, Kantonalnom sudu u Sarajevu (u daljnjem tekstu: Kantonalni sud).
- (2) Kantonalni sud donosi rješenje o žalbi u roku od tri dana od dana prijema žalbe.
- (3) Rješenje iz stava (2) ovog člana je konačno i dostavlja se, u roku od tri dana, podnosiocu molbe i Disciplinskom centru za maloljetnike, odnosno Centru za socijalni rad.

Član 48.

(Drugi slučajevi odgode izvršenja)

Općinski sud može donijeti rješenje o odgodi izvršenja odgojne mjere i kada je podignut zahtjev za ponavljanje krivičnog postupka.

Član 49.

(Prekid izvršenja)

- (1) Na molbu maloljetnika, njegovog roditelja, usvojitelja, staratelja ili Centra za socijalni rad, može se dozvoliti prekid izvršenja odgojne mjere.

- (2) Na prekid izvršenja odgojne mjere shodno se primjenjuju odredbe čl. 44. do 48. ovog Zakona.
- (3) Vrijeme prekida ne uračunava se u vrijeme izvršenja odgojne mjere.

Član 50.

(Odgoda i prekid zavodske odgojne mjere)

- (1) Odredbe čl. 44. do 49. ovog Zakona shodno se primjenjuju na odgodu i prekid izvršenja zavodske odgojne mjere upućivanja u odgojnu ustanovu, u odgojno-popravni dom ili u drugu ustanovu za osposobljavanje (u daljnjem tekstu: zavodska odgojna mjera).
- (2) Vrijeme prekida ne uračunava se u vrijeme izvršenja zavodske odgojne mjere.
- (3) Prekid izvršenja zavodske odgojne mjere upućivanja u drugu ustanovu za osposobljavanje ne može se dozvoliti ako je ova odgojna mjera izrečena maloljetniku umjesto mjere sigurnosti obaveznog psihijatrijskog liječenja i čuvanja u zdravstvenoj ustanovi.

DIO ČETVRTI - IZVRŠENJE PREKRŠAJNIH SANKCIJA

POGLAVLJE I - UKOR I ZAŠTITNE MJERE

Član 51.

(Ukor)

- (1) Izrečena sankcija ukora u prekršajnom postupku izvršava se tako da se posebno evidentira u Općinskom sudu.
- (2) Općinski sud utvrdit će način vođenja evidencije iz stava (1) ovog člana.

Član 52.

(Oduzimanje predmeta)

- (1) Zaštitnu mjeru oduzimanja predmeta izvršava Općinski sud, na način propisan zakonom.
- (2) Troškovi koji nastanu prinudnim izvršenjem zaštitne mjere iz stava (1) ovog člana snosi lice kome je ta mjera izrečena.

Član 53.

(Zabrana vršenja poziva, djelatnosti ili dužnosti)

Zaštitna mjera zabrane vršenja poziva, djelatnosti ili dužnosti izvršava se na način propisan u čl. 15. i 16. ovog Zakona za izvršenje mjere sigurnosti zabrane vršenja poziva, aktivnosti ili funkcije.

Član 54.

(Potpuna ili djelimična zabrana upravljanja motornim vozilom)

Zaštitna mjera potpune ili djelimične zabrane upravljanja motornim vozilom izvršava se na način propisan u članu 17. ovog Zakona za izvršenje mjere sigurnosti zabrane upravljanja motornim vozilom.

Član 55.

(Vanbolničko liječenje od zavisnosti)

- (1) Zaštitna mjera vanbolničko liječenje od zavisnosti izvršava se u ovlaštenoj ustanovi koju odredi Općinski sud, na način koji odredi Općinski sud.
- (2) Troškove obaveznog liječenja, za lice koje nije zdravstveno osigurano, kao i dio troškova koje, po posebnim propisima, snosi sam osiguranik, za kažnjeno lice koje ima prebivalište na području Kantona, snosi Kanton.

Član 56.

(Druge zaštitne mjere propisane posebnim zakonom)

Druge zaštitne mjere propisane posebnim zakonom izvršavaju se na način i pod uvjetima utvrđenim tim zakonom i zakonom kojim su regulisani prekršaji u Federaciji Bosne i Hercegovine.

Član 57.

(Dostavljanje prekršajnog naloga radi izvršenja)

Ovlašteni organ za izdavanje prekršajnog naloga dužan je da, u roku od tri dana od dana kada je prekršajni nalog kojim je izrečena zaštitna mjera iz čl. 52. i 54. ovog Zakona postao konačan i izvršan, dostavi taj prekršajni nalog Općinskom sudu radi izvršenja.

DIO PETI - IZVJEŠTAVANJE O IZVRŠENJU SANKCIJA

Član 58.

(Podnošenje izvještaja)

- (1) Organi iz člana 3. ovog Zakona, dužni su podnositi izvještaj Skupštini Kantona o izvršenju sankcija iz člana 1. ovog Zakona, najmanje jedanput godišnje.
- (2) Organi iz stava (1) ovog člana dužni su, po zahtjevu Skupštine Kantona ili Ministarstva pravde, podnositi izvještaje o izvršenju sankcija i za kraći period ili samo za određenu vrstu sankcija.

Član 59.

(Metodologija podnošenja izvještaja)

Izvještaj o izvršenju sankcija iz člana 58. ovog Zakona podnosi se putem Ministarstva pravde, po metodologiji koju, pravilnikom, utvrđuje kantonalni ministar pravde.

DIO ŠESTI - PRIJELAZNE I ZAVRŠNE ODREDBE

Član 60.

(Izvršavanje pravosnažnih odluka inostranih sudova i sankcija izrečenih stranim državljanima i licima bez državljanstva)

- (1) Po odredbama ovog Zakona izvršavaju se i pravosnažne odluke inostranih sudova, ukoliko posebnim zakonom Bosne i Hercegovine ili međunarodnim ugovorom nije drukčije određeno.
- (2) Po odredbama ovog Zakona izvršavaju se i sankcije izrečene stranim državljanima i licima bez državljanstva, ukoliko posebnim zakonom Bosne i Hercegovine ili međunarodnim ugovorom nije drukčije određeno.

Član 61.

(Rok za donošenje pravilnika)

Pravilnik iz člana 59. ovog Zakona, ministar pravde donijet će u roku od 60 dana od dana stupanja na snagu ovog Zakona.

Član 62.

(Ravnopravnost spolova)

Gramatička terminologija korišćenja muškog ili ženskog roda u ovom Zakonu podrazumijeva uključivanje oba roda.

Član 63.

(Prestanak važenja Zakona)

Stupanjem na snagu ovog Zakona prestaje da važi Zakon o izvršenju sankcija u Kantonu Sarajevo, br. 14/00, 8/01, 10/02 i 28/03).

Član 64.

(Stupanje na snagu Zakona)

Ovaj Zakon stupa na snagu osmog dana od dana objavljivanja u "Službenim novinama Kantona Sarajevo".
